



Fasnacht 2018

Alti Basler Dante

sit 1947

## Vo dr Baustell e Gruess, drum geen mir z Fuess!

Zää Wägelifasnächtler, glai und grooss,  
die gwaggle zämmen uff der Strooss,  
mache Fasnacht das Joor grad per Pedes,  
es faart kai Waage, ziet kai Mercedes.

Trotz Wältkultur e Sach, e jääsi !  
Hesch gsee die Baustell deert im Bläsi?  
E hooche Duurm mitts uff em Blatz,  
wie scheen das ussgseet, gäll du Schatz!

Und lueg, wie scheen, e Kaffi im Foyer,  
fir Alli wenn si waarte mien, ooh jee...  
uff dr Lift, uff d Goofe, uff wäär au immer  
hejo, me waartet nimm im Gang, vor em  
Glassezimmer.

Und wenn mir grad bim Sujet sin...  
Baustelle sin jo schliesslig „in“.  
Kuum aini fertig, kunnt die näggscht,  
und wyter goots im Baustell – Thäggscht!

Ebb neetig ooder nit isch offe,  
kaa me no schlugge in dr Noot.  
Doch kinschtig staue, Hepperli baue,  
mir finden as das nimmi goot!

Hän dir nit langsam d'Schneere voll,  
vo Wessel's Greesewaan und Groll?  
Mir mien ys frooge und das ganz drogge,  
kaa me däa Waansinn(igi) nimm stoppe?

Nit numme im Bläsi gits aarmi Sieche,  
die ganzi Stadt vom Gundeli bis Rieche,  
gseet rootwyssy Latte, Baggerläärm und Grach.  
Nunde faane, doo goots zer Sach!

Am Stainebäärg und uff dr mittlere Brugg,  
au em Doorebach goots hii und zrugge.  
Het Schiine mässe ebbis z due mit Gligg?  
Nai, zwai Mool mache isch doch schygg!

Wenn de dänggsch s kunnt nimme schlimmer,  
deent dr Wessels mit sym Wessels-Gwimmer:  
„Rootliechter mues me lenger mache!“  
Saag emool, isch däa nooni ganz bache?

„...und Wellofaarer derfe ney au bi root,  
ooni halte, rächts abbiege, wenn das goot!“  
Wie wenn sich aine vo dääne Wello-Spatze,  
um d Gsetz wurd kimmere und gratze!

Bigoscht, vo Minggestai bis Pfaffeloo,  
kasch ooni stelperle nimm koo,  
vo Blätzbums bis zem Buurfälder Haag,  
bruuchsch fascht zwai und e halbe Daag!

Kaas das syy? HEEE, duu deert Maa, duu Frau...  
und vo de Keschde schwätzt kai Sau?  
Isch d Kasse läär und s Zyyg nooni eso wyt,  
gits aifach e Noochdraag zem  
Noochdraagsgredit!

Dr Basler wird fir bleed verkaufft,  
mir wisse doch alli wie das laufft.  
Drum mache mir ganz akuraat  
grad sälber do ai Inseraat.

**Mer suech staargi Sieche, scheeni Fraue  
und Kinder, wo wänn hälfe schnäller baue.  
S goot nit aa, as die Baustelle - Lecher  
als greaser wäärde, nooch und neecher!  
Kaasch und wotsch du das au nimmi gsee?  
denne mach mit bi dr ABD.**



**Delifon Stellevermittlig: 061 701 76 69  
Websytte & E-Mail: [www.alti-basler-dante.ch](http://www.alti-basler-dante.ch)**

S Zyyt isch, mer sueche couragierti Lyt  
wo mit uns das groos, bolitisch Nyt,  
garschtig, gaischtige gingge, sygs wie s well,  
und dää Filz verrysse, uff dr Stell.

Raff di uff, kumm au und syg nit stuur,  
mer mache zämme lääbigi Wältkultuur!

\*\*\*\*\*

Ladäärne findsch alli zämme uff em Minschterblatz,  
Wääge und Reggwisyte kaa me vor dr Kasäärne aaluege.  
Baides isch offe vom Määntig Znacht bis em Mittwoch  
Demoorge. Deert und an de drey Verkaufsständ (CINS) in  
dr Stadt gits au alli Zeedel und Schnitzelbängg, Blagette  
und dr Rädäbäng.

\*\*\*\*\*